



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-383/01

Sarajevo, 06. jula 2001.

Z A P I S N I K

sa 11. sjednice Predstavničkog doma Parlamentarne skupštine Bosne i Hercegovine,
održane 06. jula 2001. godine

Jedanaesta sjednica počela je sa radom u 11,25 sati. Prisustvovalo je 39. poslanika. Opravdano su odsustvovali poslanici Hilmo Neimarlija, Bahrija Osmanović i Branislav Lolić.

Kao gosti sjednici su prisustvovali Jozo Križanović, predsjedavajući Predsjedništva BiH i Beriz Belkić, član Predsjedništva BiH.

Ispred Vijeća ministara prisustvovali su: Zlatko Lagumdžija, Svetozar Mihajlović i Krešimir Zubak, zamjenici ministara Jadranko Prlić, Ivica Mišić, Milovan Blagojević, Gordana Ković, Nikola Kragulj, Muharem Imamović i Jusuf Halilagić. Odsustvo su opravdali Rasim Kadić i Zora Marijanović.

Iz međunarodnih organizacija bili su prisutni: ambasador Dieter Woltmann, zamjenik šefa Misije OSCE-a u BiH, Dario Šikuljak, pravni savjetnik, Dejan Vračić, predstavnik Odjela za izbore i implementaciju, Nina Šandrk, predstavnik Odjela za demokratizaciju i PSP projekat, Ms Fiona mc. Ilwhan, ambasador Engleske u BiH.

Predsjedavajući Doma Sead Avdić upoznao je poslanike da je neposredno pred početak sjednice zasjedao Prošireni kolegij radi analize predloženog dnevnog reda i da je usaglašen neznatno korigovani dnevni red u odnosu na predloženi prilikom saziva sjednice. Naglasio je da je u vezi s Prijedlogom zakona o izmjenama i dopunama Zakona o Vijeću ministara i ministarstvima BiH u Vijeće ministara došla intervencija zamjenika Visokog predstavnika u smislu da se ovaj prijedlog zakona vremenski dugo nalazi u parlamentarnoj proceduri, te da bi novo Vijeće ministara trebalo Predstavničkom domu uputiti jedan cjelovit i osmišljen prijedlog, zbog čega je ovaj prijedlog skinut s dnevnog reda ove sjednice. Također je predsjedavajući napomenuo da je Prošireni kolegij skinuo s dnevnog reda Ugovor o državnoj granici između Bosne i Hercegovine i Republike Hrvatske dok se ne pribavi izvještaj međudržavne komisije o usaglašavanju granične linije.

U diskusiji povodom prijedloga dnevnog reda učestvovali su:

Adem Borić – upoznao Dom da je stav Kluba poslanika SDA da je danas trebalo razmatrati i usvojiti Zakon o izmjenama i dopunama Zakona o Vijeću ministara, sa amandmanima, ili bez amandmana.

Osman Brka – povodom skidanja Prijedloga zakona o Vijeću ministara upozorio je Vijeće ministara i Kolegij da ne čine ovakve stvari, naglasivši da se vidi da Alijansa za promjene

ne funkcioniše i da se to ovakvim radom i stavlja do znanja da ne funkcioniše i da nema konsenzusa u Alijansi.

U vezi s prijedlogom dnevnog reda, odnosno skidanjem Prijedloga zakona o izmjenama i dopunama Zakona o Vijeću ministara dalje su diskutovali Svetozar Mihajlović, Muharem Imamović i Mirko Banjac.

Mirko Banjac u svojoj diskusiji, pored ostalog, rekao je da na Proširenom kolegiju usaglašeni dnevni red ne ide na glasanje, te da promjene istog mogu predložiti samo poslanici.

Predsjedavajući Avdić je prijedlog dnevnog reda ipak dao na glasanje iz razloga što je predsjedavajući Kluba poslanika SDA osporio svoj glas.

Sa 32 glasa ZA (od 38 prisutnih) za 11. sjednicu Predstavničkog doma usvojen je sljedeći

DNEVNI RED:

1. Usvajanje zapisnika sa 9. i 10. sjednice Predstavničkog doma,
2. Informacija Predsjedništva Bosne i Hercegovine o stanju u Vijeću ministara BiH i stav Predsjedništva o imenovanju predsjedavajućeg Vijeća ministara BiH,
3. Prijedlog zakona o slobodnim zonama u Bosni i Hercegovini (drugo čitanje),
4. Prijedlog zakona o izmjenama i dopunama Zakona o izbjeglicama iz BiH i raseljenim osobama u BiH (drugo čitanje),
5. Zahtjev za razmatranje po hitnom postupku (član 104. Poslovnika):
 - a) Prijedloga zakona o zaštiti potrošača u Bosni i Hercegovini,
 - b) Prijedloga zakona o izmjenama i dopunama Zakona o carinskoj tarifi Bosne i Hercegovine,
 - c) Prijedloga zakona o industrijskom vlasništvu u Bosni i Hercegovini,
 - d) Prijedloga zakona o autorskom pravu i drugim srodnim pravima u Bosni i Hercegovini,
6. Davanje saglasnosti za ratifikaciju:
 - a) Sporazuma između Bosne i Hercegovine i Rumunije o unapređenju i recipročnoj zaštiti investicija,
 - b) Sporazuma o unapređenju i zaštiti investicija između Bosne i Hercegovine i Republike Makedonije,
 - c) Sporazuma između Bosne i Hercegovine i Republike Hrvatske o načinu korištenja i održavanja željezničke pruge Bihać – Knin i obavljanju nadzora od strane državnih graničnih organa,
 - d) Ugovora o određivanju graničnih prelaza između Bosne i Hercegovine i Republike Hrvatske,
7. Informacija o stanju u oblasti imigracije i azila,
8. Imenovanje tri člana Predstavničkog doma u Zajedničku komisiju radi postizanja sporazuma o jedinstvenom tekstu Zakona o izmjenama i dopunama Zakona o vanjskom dugu,
9. Izbor člana Komisije za spoljnu trgovinu i carine (umjesto g. Mirze Kušljugića),
10. Poslanička pitanja i odgovori.

Ad. – 1: Usvajanje zapisnika sa 9. i 10. sjednice Predstavničkog doma

Zapisnici sa 9. i 10. sjednice Predstavničkog doma usvojeni su jednoglasno.

Ad. – 2: Informacija Predsjedništva Bosne i Hercegovine o stanju u Vijeću ministara BiH i stav Predsjedništva o imenovanju predsjedavajućeg Vijeća ministara BiH

Predsjedavajući Predsjedništva BiH Jozo Križanović, na početku svog izlaganja je rekao da je iznenađen izmjenom dnevnog reda, koja Predsjedništvo BiH stavlja u nezgodnu poziciju. Dalje je rekao da u ovom momentu ne može dati nikakvu ozbiljnu informaciju o stanju Vijeća ministara, izuzev što zna da Vijeće ministara funkcionira normalno, a da u dalje ocjene rada Vijeća ministara u ovom trenutku ne bi mogao ulaziti.

U vezi sa drugim dijelom tačke dnevnog reda – stav Predsjedništva o imenovanju predsjedavajućeg Vijeća ministara, predsjedavajući Predsjedništva upoznao je Dom o aktivnostima Predsjedništva i obavljenim konsultacijama u vezi s imenovanjem predsjedavajućeg Vijeća ministara.

U okviru ove tačke dnevnog reda učestvovali su: Ljubomir Kovačević, Boro Bjelobrk, Mirko Banjac, član Predsjedništva BiH Beriz Belkić, Osman Brka, Mariofil Ljubić, Miro Grabovac, Zlatko Lagumdžija, Abdurahman Malkić, Violeta Kamberović i zamjenik ministra Muharem Imamović.

Poslije diskusije, u kojoj je bilo dosta replika, predsjedavajući Avdić je konstatovao da se Informacija Predsjedništva BiH prima k znanju. Naglasio je da je Predsjedništvo obavezno prema Parlamentu da u svakom momentu može i treba podnijeti usmenu ili pisanu informaciju, te da se u tom kontekstu čuva dignitet ovog doma i omogućava normalno funkcionisanje sistema vlasti.

Potom je predsjedavajući dao pauzu do 14 sati.

Ad.-3: Prijedlog zakona o slobodnim zonama u Bosni i Hercegovini (drugo čitanje)

Predsjedavajući Komisije za spoljnu trgovinu i carine Tihomir Gligorić upoznao je Dom da je Komisija u komisijskoj fazi razmatrala Prijedlog zakona o slobodnim zonama u BiH, o čemu su poslanici dobili izvještaj. Međutim, u međuvremenu se pojavilo dosta primjedbi, rekao je predsjedavajući Komisije Gligorić. Predložio je da se usvajanje zakona odloži za sljedeću sjednicu.

Stav Kluba poslanika SDS-a i razloge zašto neće glasati za ovaj prijedlog zakona iznio je predsjedavajući tog kluba Mirko Banjac.

Potom je zamjenik ministra za vanjsku trgovinu i ekonomske odnose Nikola Kragulj, uvažavajući iznesene argumente, zatražio da se razmatranje Prijedloga zakona odloži sa ove sjednice, da bi se pribavile saglasnosti svih relevantnih faktora.

Predsjedavajući Avdić je konstatovao da je Prijedlog zakona o slobodnim zonama u BiH povučen s ove sjednice i da će se, po mogućnosti, razmatrati na prvoj sljedećoj sjednici, uz pripremu materijala i ugrađivanje određenih primjedbi u predloženi zakon.

Ad. – 4: Prijedlog zakona o izmjenama i dopunama Zakona o izbjeglicama iz BiH i raseljenim osobama u BiH (drugo čitanje)

Predsjedavajući Komisije za ljudska prava imigraciju, izbjeglice i azil, Osman Brka, obrazložio je Izvještaj Komisije od 31.05.2001. godine o razmatranju Prijedloga zakona, kao i amandmane koje je Komisija prihvatila.

Predsjedavajući Kluba poslanika SDS-a Mirko Banjac u svojoj diskusiji je istakao da Klub SDS-a nije ulagao amandmane na Prijedlog zakona iz razloga što bi to značilo totalnu preradu onoga što je predloženo. Naglasio je da njegov klub može prihvatiti samo ono što se odnosi na prenošenje ingerencije u izmjenama i dopunama Zakona sa Ministarstva civilnih poslova i komunikacija na Ministarstvo za ljudska prava i izbjeglice. Napomenuo je da je Zakon o izbjeglicama donesen u redovnoj parlamentarnoj proceduri, uz saglasnost svih stranaka, te ako bude zadiranja u drugu materiju neće moći glasati za to.

Ministar za ljudska prava i izbjeglice, Krešimir Zubak, iznio je stav predlagača zakona o amandmanima poslanika Brke, a koje je i nadležna komisija prihvatila. Rekao je da u principu predlagač nema ništa protiv amandmana I i III. U vezi sa amandmanom II skrenuo je pažnju da u Budžetu BiH nema sredstava da bi se izbjeglicama obezbjedila sredstva koja se predlažu amandmanom, te da postoji bojazan da će se zakonom utvrditi obaveza koju država neće moći izvršiti. Ukoliko se ova obaveza odnosi na entitetske vlasti, nemaju ništa protiv, rekao je, pored ostalog, ministar Zubak.

Predsjedavajući Komisije Osman Brka, pored ostalog, rekao je da su on, predlažući sporni amandman, kao i Komisija kad ga je razmatrala, znali za ovaj problem, ali da se smatralo da se jednom mora zakonski regulisati to pravo ljudi i da bi to mnogo značilo za povratak, te da bi Vijeće ministara moralo uložiti napor da se nađu ta sredstva. U ime Kluba SDA zatražio je pauzu da bi se sastala Komisija radi zauzimanja stava o ovom pitanju.

Poslije pauze predsjedavajući Komisije Osman Brka obavijestio je Dom da je Komisija u pauzi održala sjednicu i da je većinom glasova podržala sva tri amandmana. Također je upoznao Dom da je Komisija, na sugestiju predlagača da je Amandman I prouzrokovao neusklađenost u članu 3. Prijedloga zakona, usvojila amandmane na član 3. koji su poslanici dobili u izvještaju Komisije sa ove sjednice. U ime Komisije predložio je Domu da usvoji amandmane i zakon. Posebno je naglasio da bi se usvajanjem amandmana III na direktan način pomogao povratak svih izbjeglica na svoje.

Predsjedavajući Avdić je konstatovao da je očito da u Domu nema pune saglasnosti za usvajanje Prijedloga zakona, te bi bilo šteta da se glasanjem odbije, jer je ovaj zakon dominantan za realizaciju Aneksa VII, za povratak i obnovu multinacionalne strukture Bosne i Hercegovine.

Ministar Zubak je u ponovnoj diskusiji izrazio volju da Prijedlog zakona povuče ukoliko postoji mogućnost da se glasanjem ne usvoji.

Dalje su diskutovali: Abdurahman Malkić, Osman Brka, Miro Grabovac i Željko Bilbija. Zatim je predsjedavajući dao na glasanje amandmane poslanika Brke, a koje je usvojila Komisija za ljudska prava.

ZA amandman na član 3. Prijedloga zakona glasalo je 26 (prisutno 36), suzdržalo se 10 poslanika. Iz Federacije BiH ZA su glasala 23, iz RS 3.

ZA amandman na član 5. Prijedloga zakona, od 36 prisutnih glasalo je 25, suzdržalo se 10 poslanika. Iz RS ZA su glasala 3, iz Federacije BiH 22.

ZA amandman na član 12. od 36 prisutnih, ZA je glasalo 26, suzdržalo se 10. Iz Federacije ZA su glasala 22 iz RS 3 poslanika.

Predsjedavajući je konstatovao da su amandmani dobili većinu prisutnih, ali nisu dobili entitetsku većinu, te da je neophodno provesti postupak usaglašavanja na Kolegiju.

Ad. – 5: Zahtjev za razmatranje po hitnom postupku (član 104. Poslovnika):

- a) Prijedloga zakona o zaštiti potrošača u Bosni i Hercegovini,
- b) Prijedloga zakona o izmjenama i dopunama Zakona o carinskoj tarifi Bosne i Hercegovine,
- c) Prijedloga zakona o industrijskom vlasništvu u Bosni i Hercegovini,
- d) Prijedloga zakona o autorskom pravu i drugim srodnim pravima u Bosni i Hercegovini

Predsjedavajući Kluba poslanika PDP-SNS-SNSD/DSP-SPRS Željko Bilbija, u ime Kluba prigovorio je na sve češću praksu razmatranja i usvajanja zakona po hitnom postupku. Iznio je stav Kluba da se može napraviti izuzetak samo za Prijedlog zakona o izmjenama i dopunama Zakona o carinskoj tarifi, a ostali prijedlozi zakona da idu u redovnu proceduru.

Predsjedavajući Avdić dao je na glasanje zahtjev za svaki prijedlog zakona ponaosob.

Nakon obavljenog glasanja predsjedavajući je konstatovao da je Dom jedino usvojio zahtjev Vijeća ministara da se po hitnom postupku (čl. 104. Poslovnika) razmatra Prijedlog zakona o izmjenama i dopunama Zakona o carinskoj tarifi – ZA glasalo 35, od 36 prisutnih poslanika.

Nije usvojen zahtjev da se po hitnom postupku razmatraju:

- Prijedlog zakona o zaštiti potrošača (ZA glasalo 25, protiv 10, suzdržan 1; iz RS ZA glasala 3, iz FBiH 19;
- Prijedlog zakona o industrijskom vlasništvu u BiH (ZA glasala 22, protiv 10 suzdržana 3; iz FBiH glasalo 18, iz RS 3;
- Prijedlog zakona o autorskom pravu i drugim srodnim pravima u BiH (ZA glasala 24, protiv 10, suzdržana 2; iz RS ZA glasala 3, iz FBiH 21.

Ad. - 6: Davanje saglasnosti za ratifikaciju:

- a) Sporazuma između Bosne i Hercegovine i Rumunije o unapređenju i recipročnoj zaštiti investicija,
- b) Sporazuma o unapređenju i zaštiti investicija između Bosne i Hercegovine i Republike Makedonije,
- c) Sporazuma između Bosne i Hercegovine i Republike Hrvatske o načinu korištenja i održavanja željezničke pruge Bihać-Knin i obavljanju nadzora od strane državnih graničnih organa,
- d) Ugovora o određivanju graničnih prelaza između Bosne i Hercegovine i Republike Hrvatske

Predsjedavajući Doma je konstatovao da su sporazume razmatrale nadležne komisije i da su poslanici dobili izvještaje.

U okviru ove tačke nije bilo diskusije.

Dom je jednoglasno dao saglasnost za ratifikaciju:

- a) Sporazuma između Bosne i Hercegovine i Rumunije o unapređenju i recipročnoj zaštiti investicija,
- b) Sporazuma između Bosne i Hercegovine i Republike Hrvatske o načinu korištenja i održavanja željezničke pruge Bihać – Knin i obavljanju nadzora od strane državnih graničnih organa,
- c) Ugovora o određivanju graničnih prelaza između Bosne i Hercegovine i Republike Hrvatske.

Ad. - 7: Informacija o stanju u oblasti imigracije i azila

Uvodno izlaganje o Informaciji podnio je ministar za ljudska prava i izbjeglice Krešimir Zubak.

Predsjedavajući Komisije za ljudska prava, imigraciju, izbjeglice i azil, Osman Brka, podnio je izvještaj Komisije o razmatranju Informacije.

U diskusiji su učestvovali poslanici: Senad Šarganović, Tihomir Gligorić, Mirko Banjac, Abdurahman Malkić, Ibrahim Đedović i Sead Buturović. Poslije diskusije govorio je ministar Krešimir Zubak.

Nakon izlaganja ministra Zubaka predsjedavajući Avdić je konstatovao da je Dom prihvatio Informaciju o stanju u oblasti imigracije i azila, sa prijedlogom mjera navedenih u Informaciji. Zaključeno je da se Ministarstvu za ljudska prava i izbjeglice dostavi magnetogram diskusije o Informaciji radi korištenja sugestija i prijedloga iznesenih u diskusiji.

Ad.- 8: Imenovanje tri člana Predstavničkog doma u Zajedničku komisiju radi postizanja sporazuma o jedinstvenom tekstu Zakona o izmjenama i dopunama Zakona o vanjskom dugu

Predsjedavajući Doma je upoznao poslanike da je na Proširenom kolegiju usaglašen prijedlog da se u Zajedničku komisiju oba doma iz Predstavničkog doma imenuju: Zdenko Vukić, Nedžad Šašivarević i Mirko Mijatović.

Prijedlog je jednoglasno usvojen.

Ad. – 9: Izbor članova komisija (umjesto g. Mirze Kušljugića)

Dom je jednoglasno izabrao:

- Omera Filipovića za člana Komisije za spoljnu trgovinu i carine,
- Damira Mašića za člana Komisije za saobraćaj i komunikacije.

Ad. - 10: Poslanička pitanja i odgovori

Na 11. sjednici Doma poslanička pitanja su postavili:

Boro Bjelobrk:

- 1) Pokrenuo inicijativu da se zamrzne Odluka Administrativne komisije Doma kojom se uvećava naknada poslanicima jer nema pokrića budžetskim sredstvima, te zatražio usklađenost sa predloženim smjernicama Vijeća ministara. Povodom te odluke zatražio precizan proračun o obezbjeđenosti ovakvih sredstava u postojećem budžetu Parlamentarne skupštine.
- 2) Ponovo potencirao dostavljanje Informacije o događajima u Banjoj Luci i Trebinju koju je od Vijeća ministara tražio prije dva mjeseca, kao i odgovor Kolegija Doma na ranije postavljeno pitanje – Šta je Kolegij doma uradio da bi on dobio traženu informaciju?

Ibrahim Đedović:

Postavio pitanje predsjedavajućem i Sekretarijatu Parlamentarne skupštine BiH – Gdje su sve boravile delegacije Predstavničkog doma Parlamentarne skupštine BiH:

- a) u mandatnom periodu 1998 – 2000;

- b) u mandatnom periodu 2000 – 2002. do danas;
- c) kakav je poimenično bio sastav delegacija, ko ga je određivao i po kojim kriterijima?
- d) kakvi su konkretni rezultati i kolika je cijena korištenja svake posjete pojedinačno?

Zoran Spasojević:

1. Iznio primjedbe što se sjednice Doma zakazuju petkom, jer to, kako je rekao, nije racionalno, te da bi i poslanici, kao i drugi, trebalo da rade ponedjeljkom, utorkom itd.
2. Predsjedavajućem i Kolegiju uputio pitanje – da li će Dom imati ljetnu pauzu da bi poslanici mogli napraviti raspored?

Mediha Filipović:

Da li je Bosna i Hercegovine potpisnik Ugovora o ekstradiciji? Ako nije kada će taj ugovor biti potpisan?

Muhamed Begović:

Pokrenuo inicijativu za donošenje zasebnog zakona o vraćanju oduzete imovine vjerskim i kulturnim zajednicama.

Miloš Jovanović:

Da li proizvode pravno dejstvo, odnosno da li ostaju na snazi ugovori o razmjeni nekretnina, zaključeni od početka ratnih dejstava do potpisivanja Dejtonskog sporazuma, između ugovorenih strana koje nisu boravile u mjestu u kome je vlasništvo njihovih nekretnina, odnosno izbjegli sa prostora FBiH i RS i obratno.

Abdurahman Malkić

Za jednu od narednih sjednica zatražio informaciju o radu i stanju u Državnoj graničnoj službi.

Predsjedavajući Avdić je, zaključujući 11. sjednicu Doma, obavijestio poslanike da mogu planirati godišnji odmor od 25. jula do 20. avgusta, a da će Kolegij sagledati obaveze koje stoje pred Domom i na osnovu toga planirati dinamiku aktivnosti.

Sjednica je završena s radom u 16,45 sati.

Sastavni dio ovog zapisnika je magnetogram 11. sjednice Doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Sead Avdić

